

摘藻堂四庫全書薈要

史部

欽定四庫全書叢要

史部

世宗憲皇帝聖訓卷

十九
二十

詳校官編修臣繆晉



欽定四庫全書薈要卷七千八百五十一

史部

大清世宗敬天昌運建中表正文武英明寬仁信毅大孝
至誠憲皇帝聖訓卷十九

訓臣工一

雍正元年癸卯正月癸卯

上諭直省主考官爾等俱係

皇考選用之人朕諒爾等必能自好是以特簡為主考官
爾等務秉公考取學問優長之士果能不徇私情聲名

金史卷十九
無忝則不但無負朕之選用亦不負

皇考愛養之恩矣回京之日朕自加陞擢如有徇私之處
經朕訪聞定行從重治罪決不寬貸

四月丁卯

上諭滿漢文武大臣官員等朋黨最為惡習明季各立門
戶互相陷害此風至今未息惟我

皇考允執厥中至仁在宥各與保全不曾戮及一人爾諸
大臣內不無立黨營私者即宗室中亦或有之爾等若

以向蒙

皇考寬大幸免罪愆仍蹈前轍致干國法昏昧極矣豈但滿洲即漢人亦與一家骨肉無異何苦波累及之夫人之性情各有所向豈有與通國之人無不投契之理但辦理公事不可存私今諸大臣俱在朕前朕居藩邸曾與爾等議及私事密相往來乎

皇考知朕中立不倚是以命朕繼承大統朕自思之亦惟朕方能不戮一人無一人不保全耳朕非獨因

皇考付託之重實感

皇考四十餘年教養深恩委曲周至言念

弘慈昊天罔極此朋黨之習爾諸大臣有則痛改前非無則永以為戒爾等當思

皇考數十年寬厚之恩亦當共體朕委曲保全至意若仍怙惡不悛朕雖欲勉強仰體

皇考聖衷力為寬宥豈可得乎夫朕言是即宜遵行朕言非即宜陳奏朕未嘗拒也朕屢詔求言雖小臣欲進言

者咸得上達每多召入屏去左右令其面陳爾諸大臣
非不得奏之人乃隱匿不奏退有後言某人不當用某
事不當行誠小人之惡習也夫朕所用之人所行之事
如有不當爾等身為大臣何難陳奏所言果是朕即用
之如不奏而但肆譏議設有人詰以不奏之故能無愧
於心耶賢者朕之所好爾等即宜好之不肖者朕之所
惡爾等即宜惡之乃或其人為朕所信任盡心竭力於
國家之事則反謂其專擅作威如此人孰肯效其所為

自取誹謗乎其或唯諾成風諸事不問但思自便其身
為己則得矣於國何補夫君親大義也譬如父之讐則
與之相愛父之愛則與之為讐為人子者有是理乎要
之以君之好惡為好惡然後人人知改其惡而遷於善
君臣一心國之福也傳之萬世亦有令名爾等其祇承
朕諭

十月戊午

上諭內閣九卿詹事科道等從來用人之道必兼聽並觀

疇咨博採方能允當而無失朕於選用人員勤加咨訪
正以朕一人之耳目有限不若合爾諸臣之見聞始無
遺漏也乃爾等僉云未能深知互相推諉夫百職在廷
四方具集同鄉親故豈無見聞其賢者即小善亦應稱
舉不肖者即小惡無容隱匿若知其賢而不言是謂蔽
賢知其不肖而不言是謂黨惡即如月選官內有劉尚
儉者係四川夔州府叅革貪酷知府劉天觀之子其父
刻剥民膏為伊子捐職罪莫大焉如此之人豈可錄用

在廷豈無一人知之者乃俱緘默不言以此推之可見
知而不言者甚多爾等之意惟恐結怨於朋友不若徇
情容隱自保功名雖誤朕選用之事而不顧貽害於地
方而不恤試思得罪於朋友與見棄於君父孰重孰輕
全一人之功名與貽地方之患害孰大孰小即所舉之
人為賢為不肖朕不過於引見時借以參酌自有裁奪
並非責爾等保其終身無過致貽日後之累何必過慮
乎嗣後務宜痛改積習苟有見聞即從實舉出進賢勿

避嫌退不肖勿避怨朕生平惟以真誠待人爾等亦當
以至誠報朕尚其各抒忠悃勿負朕推心置腹之至意
雍正二年甲辰二月丙午

上諭八旗文武官員人等我國家念爾等祖父皆屬從龍
舊臣著有勲績故加恩後裔量才授官冀收心膂驅策
之效爾等自當恪守官箴勤勞王事建股肱之盛烈垂
清白之家聲庶幾上以仰報君恩下以顯揚世美乃每
見旗員居官不能悉體朝廷期望之意賢否雜出志行

不齊由筮仕之初輒謂旗人與漢人不同漢人無累可
以硜硜自守旗人則本旗官屬需索多端親族往來責
望甚衆萬一任滿又不免有當差之累此念一起百弊
叢生不以忠君體國為心不以曠職殃民為懼潛通賄
賂恣意苞苴惟期囊橐之充盡喪廉隅之守殊不思國
家察吏廉者獎貪者懲滿與漢無二法也爾等果能潔
已奉公始終一節休聲丕著惠政日聞朕自當從優擢
用以示獎勵凡所過慮皆可不必如其不然則法網難

寬縱家擁厚貲安能坐享乎至於爾等家世武功業在
騎射近多慕為文職漸至武備廢弛而由文途進身者
又祇徼倖成名不能苦心向學玩日愒時迄無所就平
居積習尤以奢侈相尚居室器用衣服飲饌無不備極
紛華爭誇靡麗甚且沉湎梨園遨遊博肆不念從前積
累之維艱不顧向後日用之難繼任意糜費取快目前
彼此效尤其害莫甚朕特加諄諭自此以後出仕者各
宜精白乃心靖共爾位人人以廉能自矢不得藉旗人

多累之說以遂其罔上行私之術八旗子弟各習其業
文則潛心制義博覽詩書務求用世之實學武則嫻習
弓馬講究韜畧預儲閫外之良材且各崇儉戒奢安分
循禮父誡其子兄誡其弟與其恣情縱意博一日之豪
華何如量入為出謀百年之生計與其蕩檢踰閑作無
藉之匪類何如謹身寡過勉有用之事功以報朝廷以
綿世澤以敦風俗以保身家顧不美歟大雅之詩曰凡
周之士不顯亦世蓋欲䟽附後先之子孫亦世世修德

與周匹休也爾八旗皆佐命後昆深願克紹前修榮名
悠遠國家亦重有賴焉其各欽承毋忽

三月丁丑

上諭山東巡撫黃炳爾以父子兄弟同登仕籍繕摺謝恩
爾一門榮寵固幸遭逢然必能互相砥礪感恩圖報方
期福澤綿遠若倚恃家庭顯耀任情縱恣朋比黨援轉
相請託順之者曲意容隱逆之者多方排擠甚至欺君
虐民有所不顧如此則目前富貴非為福基翻為禍媒

歷觀古今人事履盛滿之時不惟不敢稱慶更加謙謹
所以世代子孫長保安全也爾可體此意傳親族之在
仕籍者俱令知之

戊寅衍聖公孔傳鐸子孔繼溥率五氏後裔六十
六人具表謝

恩

上諭孔繼溥等曰爾等是聖賢後裔與衆不同必心為聖
賢後裔之心恪守先聖先賢之訓方為不愧朕誥學大

典爾等遠來特行召見面諭爾等慎修厥德以繼家聲

六月庚寅

上諭吏部直省督撫統轄屬員必中正和平推誠體察屬員有一善則獎勸誘掖以成之其微瑕小疵則多方訓導使之省改必至怙過不悛方據實題叅如此始能激濁揚清於地方有益若妄自尊大暴戾恣睢甚而一言不當即加叱辱如四川巡撫蔡珪慢罵屬官以致重慶府知府蔣興仁憤激而死似此褊急任性不惟有乖大

臣之體且恐屬吏相率顧畏阿順取容喪其氣節尚欲
建立功名安可得乎爾部行文各督撫須仰體朕意正
已率屬虛懷待下即檄行申飭亦無慢罵之理至尊卑
相見尤有一定典儀毋得倨傲致長諂諛之風其部院
堂官亦當和衷翕受待屬員以禮始不負朕委任之意

七月丁巳

上諭諸王貝勒公滿漢文武大臣官員等朕即位後於初
御門聽政日即面諭諸王文武大臣諄諄以朋黨為戒

今一年以來此風猶未盡除

聖祖仁皇帝亦時以朋黨訓誡廷臣俱不能仰體

聖心每分別門戶彼此傾陷分為兩三黨各有私人一時
無知之流不入於此即入於彼朕在藩邸時敬慎獨立
深以朋黨為戒從不示恩亦無結怨設若朕當年在朋
黨之內今日何顏對諸臣降此諭旨乎

皇考深知朕從無偏黨必能保全爾諸臣名節故

命朕繼承大統今日大小臣工所以安然無事得享太平

之福者皆我

皇考之恩賜也朕平日並未樹立黨援而登踐寶位爾等
亦可知朋黨之無益矣夫朋友亦五倫之一往來交際
原所不廢但投分相好止可施於平日至於朝廷公事
則宜秉公持正不可稍涉黨援之私朕今御製朋黨論
一篇頒示爾等須洗心滌慮詳玩熟體如自信素不預
朋黨者則當益加勉勵如或不能自保則當痛改前非
務期君臣一德一心同好惡公是非斷不可存門戶之

見即爾等彼此亦當互相砥礪時相訓誡行事共求當理諸臣不負朕心則朕可不負

皇考付託之重朕之不負

皇考全在爾諸臣之贊成朕得為天下之令主也諸臣不負朕朕豈忍負諸臣乎朕之用人加恩容有未當之處或不能自信至於治人以罪無不詳慎間有法外寬貸之處不令人知者即下一嚴旨亦求至當從未隨意輕加呵斥此朕可自信者也如七十之惡亂舉國皆知發

遣在道竟寬其械繫臨行時王大臣內多有贈遺此朋黨未消之明驗也夫朕用一人而非其黨者嫉之罰一人而是其黨者庇之使榮辱不關於賞罰則國法安在乎嗣後朋黨之習務宜盡除爾等須捫心自問不可陽奉陰違以致欺君罔上悖理違天毋謂朕恩寬大罪不加衆倘自干國法萬不能寬朕雖未必盡行誅戮然或千人之中百人百人之中十人爾等能自保不在百人十人之列乎爾等務期斷絕黨私同心輔佐盡誠極言

勿使朕躬有過此朕所厚望於爾等也凡人於朋友箴規尚不可背况君臣大義耶爾等當上念朝廷任用之恩下為身家子孫之計各勉之慎之

雍正三年乙巳六月丁卯

上諭內閣昔

聖祖仁皇帝明目達聰無微不照而關係國計民生之事尤殷採訪屢降

諭旨令內外臣工各抒所見不時條奏無非欲洞悉下情

興利剔弊期臻上理也在廷諸臣不能仰體

聖懷未見有剴切數陳裨益政事者如科道等官之章奏或請開例捐納或請開設礦廠或請節省錢糧種種假公濟私之處不可枚舉皆在

聖祖仁皇帝洞鑒之中故近年來條奏之事

聖心裁擇其可行者見之施行其不可行者概置勿用而言官之不得遂其私者反有

聖祖仁皇帝不甚納諫之妄議此等小人情狀朕在藩邸

知之甚悉疾之甚深故臨御以來諄諄誥誡期其各矢
公忠直陳無隱夫條奏者原欲上以匡君下以澤民非
為臣子沽名之具也朕原有旨即密奏中朕不行者若
有真知灼見力懇施行仍准其露章陳奏非必止於密
奏也因念諸臣之欲進言者或多所顧忌或恐招怨尤
或有牽制之情或有不便顯言之處故令各人密封進
呈其中言有可採而易於招怨者朕將摺內職名裁去
發出或令諸臣會議或即見諸施行而外間不知何人

所奏其所以如此者無非欲人人盡其所言無所瞻顧迴避而朕得收聽言之實效於治理大有裨益也乃有詐偽之人因所奏既行而誇耀於人者亦有因裁去銜名無可稽考竟將他人陳奏之事據為已有者亦有謂出之自朕託言諸臣而實非諸臣之條奏者種種浮言深可痛恨又常見人文集中有擬藁未上之奏疏夫既有此疏何以未上既云未上何故存藁此乃欺罔之徒內懷詐偽外託忠誠遇事不敢直言故飾虛詞傳播人

口以欺世盜名也且更有以特恩施行之事而冒為已
功者如蠲免蘇松浮糧一事係戶部所奏恩自朕出並
無一人條陳近聞有人自稱為彼之密奏者人而無恥
至於此極朕念為政之道首在得人故自即位以來於
文武大小臣工皆留意簡選而於伊等陞見之日必召
入面詢親加訓誨欲其潔已奉公勤修職業謹守法度
愛養兵民丁寧誥誡至再至三無非諭及內外事務及
勉勵官方之語而諸臣出外每每任意增減多方粉飾

以誇示於衆竟有與原降諭旨甚不相符者此皆大有
關係著凡文武官員曾經面奉諭旨除不能記載者俱
將訓旨一一詳細將年月日一同繕寫進呈内外文武
大臣著自行封進其不應摺奏之員著封固交與該上
司轉奏自今以後凡面奉諭旨者俱著繕寫進呈若不
繕寫進呈但私相傳播及私自記載者即係假捏旨意
定當從重治罪

雍正四年丙午正月乙未

上諭滿漢大臣等今日君臣同堂合宴海宇承平上下和
樂皆我

聖祖仁皇帝深仁厚澤之所留貽也豈能暫忘思慕之情
豈敢稍弛警惕之念乎朕之才德遠不及我

皇考今萬幾殷繁一人識力有限用是朝乾夕惕晷刻靡
寧仰惟

祖宗付託之重下念萬民待澤之殷全賴爾諸臣同心一
德輔佐朕躬使庶政無不就理兆民無不被澤以成熙

熙皞皞之風此朕所深望也夫移風易俗端於大臣是賴自古人臣之誼公爾忘私不可有游移瞻顧之心黨援朋比之習每見徇私不法之人好為夤緣互相請託揆之於義則請託實為可羞而度之於命則請託究屬無益且積習相沿遂成風俗既為子弟親戚營求作弊是教之不以正矣何足為其師範徒使子弟親戚有所恃以無恐終歸於壞品喪志不能上進其害可勝言哉朕於爾諸臣實以股肱手足一體相視爾諸臣亦當公

忠體國視君上如元首腹心若悠悠忽忽安於習俗而不知奮發鼓勵爾諸臣自待居何等耶况朕在藩邸閱歷四十餘年人情世態無不周知亦非可以欺隱蒙蔽者如年羹堯隆科多營私挾詐深負朕恩不旋踵而事敗露爾諸臣自度才幹伎倆未必能如彼二人若營私自便稍有不檢不惟薄待其身兼懼罹於國法尚可立身朝端為衆人之表率耶從來朋友箴規一言尚當聽受况君上乎朕諄諄誥誡者無非欲爾諸臣各矢公

心盡除私意如果能時時仰體朕訓彼此互相勸勉則天下之人觀感變化而風俗盡歸於淳厚爾諸臣之家子孫亦並受其福矣

三月甲寅

上諭八旗漢軍官員等人臣事君須明大義固不可矯情立異尤不可挾私黨同習氣陷人流而不返每至乖於大義皆由察之不早挽之不力故也八旗漢軍向來惡習好通聲氣凡内外文武官員無論平素識與不識一

登仕籍必信息相通互相袒護雖其初意不過矜名圖利然積久不改種種偏私固結害正誤公漸成大惡矣夫立身事主豈有二理若果能孤介一秉至公自然能獲乎上否雖竭盡心力徒然敗品喪名而且犯義撓法況此輩要結原非至誠利則同爭害則各避究何益乎夫同此固結之心也於君則為忠於友則為黨忠則為君子而賞必及之黨則為小人而罰亦必及之雖至愚之人亦未有不欲為忠良之君子而甘為匪黨之小人

以避賞就罰者也毫釐之差天淵之判可不慎歟或有云人非聖人誰能無私又云瞞上不瞞下此等陋諺不知出自何典爾等既登仕籍奈何為此市井無賴之談以自絕於聖人而願爲有私瞞上之人耶况朕從前局外旁觀三十四年一切情態知之甚悉汝欲瞞上而上究不能瞞汝不瞞下而下實互相瞞也深可憫歎漢軍中公正不阿之人朕皆委任信用如楊宗仁持身剛介既歿之後尚屢邀朕恩爾等若咸能實心遵朕訓諭效

法正人必寵渥厥身慶流後裔若面是心非不能悛改
惡習不但身遭黜罰此風不息後人效尤必且貽害子
孫嗣後各宜公忠自立共絕攀依官無論崇卑惟盡已
職事無論大小惟盡已心人人皆能孤介則衆孤介和
合而成一德同風之盛矣

四月庚午貴州巡撫何世璠奏請

訓旨

上諭曰地方要務朕既未親歷其境安能悉知即有所見

亦不過得之傳聞總賴爾等大臣無欺無隱據實入告
君臣同心商酌則可耳至於居心立志應如何處朕今
一一諭示於爾若能實力遵奉而行於地方吏治自大
有裨益也不可惟務虛名而廢實事不可但求潔已而
不奉公不可以因循為安靜不可以生事為振作毋偏
柔善以盜寬仁之譽毋事姑息以邀屬員之感毋徇友
朋之情而欺主母受權要之託而誑君黔省錢糧有限
爾之操守朕所素知再者武備不宜輕視稍致懈弛當

十分留心時加鼓勵苗夷雖蠢而無知然亦人也若地方有司實意矜恤令其知感營伍嚴肅令其知畏朕可保其永遠無事恩威二字萬不可偏用偏用之目前雖有小效將來必更遺大患非為國家圖久安之策朕所不取鑑別屬員不可盡以科甲為人材而視他途為市井小人自古用人無方賢愚豈宜如此區別凡事虛衷秉公切勿預蓄成見平心以待彼來此應何事不得其理也勉之勉之莫負朕倚任之重

六月乙丑

上諭山西巡撫伊都立地方大吏一切關係地方事件務必實力行之不可視為具文即如嚴保甲查私鑄斷燒鍋禁賭博皆朕令爾等奉行之事倘接到諭旨毫不經意只發幾張告示行之州縣貼於通衢即以為我已奉行矣嚴禁矣是將誰欺乎要必實心遵奉細訪密查果有違犯重治其罪則懲一可以儆百使法在必行方為有益并諭令屬官使皆知奮勵辦理一切事件悉出誠

心卽如盜案獲賊過半照案緝拏雖有成例然必設法
訪查務期全獲抵之於法則人知畏懼盜源可清矣大
凡爲大吏者當正己率屬砥礪廉隅持身孤介固不可
貪婪肆志亦不可矯飾偏枯不可一味姑容以貽悞亦
不可謬加叅劾以塞責凡事悉準天理尊君親上善則
歸君過則歸己人臣之義當如是也朕待臣下開誠布
公爾等有何疑慮而不坦白乃心以取信於朕慶君臣
之交泰乎其竭力經營殫心籌畫毋負朕簡任之意

十月庚申

上諭內閣部院大臣等朕宵旰勤勞勵精圖治諄諄以正人心端風俗為首務而欲人心風俗同歸於善必先去其營求請託之私而後可以成公平之化大臣者羣僚之表率也職官者士庶之儀型也大臣不能去營求請託之私則標準不立而百僚士庶相習成風更無所底止矣外省督撫藩臬皆地方大吏其所辦理皆地方緊要之事若在京大臣以私情囑託必致進退人材不得

其實聽斷獄訟不得其平種種倚仗勢力顛倒是非夤緣奔競之事皆由此起民生何由安吏治何由肅乎夫交以道接以禮聖人所不廢內外官員凡有問候書札及餽遺往來而無所干瀆者不必拒絕有關說請託者宜嚴行禁止地方大吏正當謝絕知交囑託之私情以除向來相沿之陋習在廷諸臣亦可舉國法以謝親知秉公去私共襄移風易俗之化慎之勉之

十二月庚辰

上諭內閣年來冬月封印之後政務畧有餘閒朕手書福字賜內外大臣諸臣奏謝皆稱受朕賜福之恩此世俗之言非正理也朕何能以福賜諸臣哉不但朕也即

上天亦豈能以福私與一人哉書曰惠迪吉從逆凶又曰天道福善禍淫易曰積善之家必有余慶詩曰自求多福古聖人之垂訓深切著明如此從來善惡之報如影隨形福緣善慶視乎其人之自取他人不能助纖毫之力也且所謂福者不在乎富貴貧賤之間有富貴人之

福有貧賤人之福或貧賤之人循理守分無患無憂其
心志安舒四體暢適轉在富貴人之上是人人各有其
福也朕之每年頒賜福字者蓋欲諸臣觸目警心時時
存可以獲福之心行可以獲福之事如詩人之所言自
求多福則諸福集於其身矣諸臣又嘗言賴朕之福此
言亦屬非是蓋必諸臣皆有福方為朕之福是朕實賴
諸臣之福也又必天下百姓皆有福然後為吾君臣之
福是君與臣皆賴百姓之福也願與諸臣共勉修福之

道可耳

大清世宗敬天昌運建中表正文武英明寬仁信毅大孝
至誠憲皇帝聖訓卷十九

欽定四庫全書薈要卷七千八百五十二

史部

大清世宗敬天昌運建中表正文武英明寬仁信毅大孝
至誠憲皇帝聖訓卷二十

訓臣工二

雍正五年丁未正月甲辰

上諭內閣覽諸王大臣等奏稱河水澄清二千里期逾兩
旬為從來未有之瑞懇請陞殿慶賀朕嘗言天下至大
庶務至繁斷非人主一身所能經理必賴內外臣工協

力贊襄然後可以成一道同風之盛若上有涼德之主而下皆臯夔稷契之臣則工虞水火佐理有人政務亦不患其不舉若上有堯舜之主而下皆共工驩兜之輩則耳目股肱無所資藉政務亦必至於廢弛故人君之道以得人為要而人臣之道以奉職為先此一定之理也朕統臨萬方雖刻刻有勵精圖治之念然必賴內外臣工共矢公忠各殫才力然後有實政實效及於吏治民生方可以感

天和而錫繁祉不然則朕雖有勤政之念豈能事事躬親
辦理也今見數年之中荷蒙

上天

皇考默佑疊錫嘉祥茲又有河清之上瑞朕細推天人感
應之理自非無因當由內外臣工能體朕宵衣旰食之
懷洗陽奉陰違之習分猷効職有數端之善上合

昊天

皇考之心是以錫茲福慶以勵將來爾等試再思之人事

甫修僅有數端之善即邀

上天

皇考之嘉貺若此倘能益竭忠誠事事皆善則其獲福又當何如或由此而侈然自足怠惰前修則其獲譴又當何如可不慎乎可不懼乎況天道惡盈朕心方且因此益加戒儆所請慶賀典禮朕必不行朕念君臣之間實屬一體

上天

皇考既垂訓於朕朕即以此訓及諸臣

上天

皇考既錫福於朕朕即以此福及諸臣凡屬京官自大學士尚書以下主事以上內大臣都統前鋒統領護軍統領步軍統領以下叅領以上凡屬外官自督撫以下知縣以上武官自將軍提鎮以下叅將以上俱著加一級其王公等管理部院都統事務者應如何加恩之處著宗人府議奏自茲以往內外臣工當益加黽勉精白乃

心和衷共濟矢勤矢慎秉公去私凜

天鑒之匪遙念感應之不爽以至誠至敬仰承

上天

皇考之眷佑則受福孔多永永勿替矣勉之勉之

八月庚子

上諭大學士九卿等天下庶務殷繁斷非一人所能辦理
朕宵旰勤勞勵精圖治而分猷贊理之任實於爾諸大
臣是賴為大臣者必須視國事如家事方可謂之公忠

不負朕股肱心膂之寄如爾等自理家務必商酌盡善
措置得宜斷無漫然為之聽其錯誤不為釐正之理至
於教導家人約束奴僕其分別優劣賞罰寬嚴之間爾
等亦斷無率意而行之事而獨至辦理公事之時類多
苟且塞責漫不經心或隨衆畫題畫行而於其中之原
委曲折茫然不知或心知其不可而瞻顧不肯直言以
為非我一人之事不如隨班逐隊以免是非至於接待
屬員如同僚友平時不辨別其是非不督責其過失及

至甄別之際又復瞻徇情面曲直不分種種陋習皆部
院大臣所不能免古人云公爾忘私國爾忘家言人臣
既以身許國即當置家事於不問也今縱不能如古人
之體國奉公忘私忘家亦安可視國事家事截然分為
兩途而輕重疎密其相去若是之遠哉庸臣具臣之習
切宜深戒朕日以良臣名臣之道期望大臣爾等慎勿
菲薄自待重負朕期望之心至於諸臣存心之誠偽朕
觀其陳奏之言辦理之事即可洞悉其隱微或改變初

心或屏除舊習朕一見無不知之不可不自勉也夫人臣之弊莫大於迎合上意此朕所深惡而日加訓誡者朕欲大小臣工俱為好官爾等若欲迎合朕意何不即以勉為好官為迎合之首務則朕之心慰爾等亦無負於朕矣

庚戌八旗都統帶領各旗副佐領引

見

上諭八旗人員乃國家根本所關甚重養育教誨不可少

懈佐領者乃統轄一佐領之人俾佐領下人等皆不失
生計不染惡俗養之教之使趨於善莫要於佐領爾等
理宜為國家宣力正己率物教育所轄佐領下人佐領
內有原管佐領有世管佐領有公中佐領原管佐領乃
太祖

太宗時爾等之祖或率所部來歸或戰陣有功賞賜人口
各編為佐領令其管理是爾等與佐領下人同是滿洲
其中亦有從爾等之祖宣力國家得受世職逮於子孫

爾等理宜骨肉視之若自以為原管佐領將佐領下人
視同奴隸而陵賤之豈惟國法不容亦敗汝祖勤勞所
立之基業矣世管佐領因爾等之祖曾宣力國家或人
材可用善於管轄故令其管理佐領世世相傳以至於
爾等之身爾等理宜將佐領下人愛惜訓誨念爾祖之
勤勞以永保累世所管之佐領也再管公中佐領之人
特以其能理佐領之事能教佐領下人是以揀選令其
管理益宜視佐領下人如同手足誘掖訓導誠切肫篤

則佐領下人無不成就佐領內事無不辦理矣夫佐領之管佐領下人無異州縣之於百姓州縣所轄地方或百里有餘或幾二百里戶口人民不下數萬徵糧斷訟事件繁多然猶可為地方興利除弊懲惡勸善俾庶民各遂其生一佐領下滿洲多不及二百人少或七八十人計戶不過四五十家世為同里孰守分節儉孰越禮奢侈孰孝弟勤學孰妄亂生事諒無有不知者也管佐領之人誠於佐領內之善者獎勸優待薦舉以鼓勵之

則善者益樂為善其劣者視如子弟初教之不改再則
斥辱之誠如此愛惜而訓誨之雖係下愚亦必中心省
悟倘有賦性頑劣怙終不悛者即申詳叅領都統等懲
戒之或送部治罪以警衆人則佐領下頑梗之徒咸懼
而不敢為非矣今佐領內或有不肖之人自恃身為佐
領陵虐佐領下人不論是非恣意妄行其或昏懦怠惰
之輩將佐領事盡誣之驍騎校領催轉相傳示其或貪
鄙之輩不知愛惜反貪小利而賸刻之則佐領下人何

由心服何由成就是以朕今特令每佐領設副佐領一員協同佐領辦事和衷共濟倘副佐領目無佐領不問事理肆行無忌該佐領即申詳都統若佐領與佐領下人結黨目無副佐領朦朧作弊副佐領亦即申詳都統不可彼此瞻徇情面爾等以朕訓旨謹識於心將佐領下人教育約束勉習文武之業副朕樂育八旗人材之至意

十月癸卯

上諭滿漢文武大臣等凡為國家大臣者非爵位崇顯體貌魁梧之謂必其胸襟識量所見者大方可謂之大臣朕觀諸臣中有器量小者見朕賞賜則欣喜不勝見於詞色夫受賞而欣喜若此則受罰必怨忿於心矣朕之賞罰悉出大公總視乎其人之自取受賞者當思所以致賞之由並思所以不愧乎賞之道則可以常保其恩賞受罰者當思所以致罰之由並思所以免罰之道則可以不至於再罰矣

雍正六年戊申九月甲戌

上諭內閣大凡為臣者必以報稱君上為心而不得有瞻顧身家之念古聖賢之教忠皆是道也蓋在平時則正其誼不謀其利明其道不計其功孝弟忠信一一皆盡其實而不可有一毫之虛假及乎居官則國爾忘家公爾忘私盡屏其偏陂黨同之習悉去其沽名市惠之念此之謂實心任事而智名勇功於是乎出矣夫臣下之用心在上未有不洞燭其隱微者古之良臣有嘉謀嘉

猷則入告於內而順應於外其誠意之交乎何如其懇
摯苟或挾詐任術飾貌修文隱微有潛伏之私則必不
能忠敬以事上而上有不知其情偽者乎凡學古入官
者宜矢之以至誠將之以篤敬秉虛公以揆大中之則
務正直以遵王道之平存忠君為國之實心務立身行
道之大本以此自勉更以此交勉則可以成明良一德
之盛矣

十月甲午

上諭諸王大臣等易經謙卦之辭曰天道虧盈而益謙地道變盈而流謙鬼神害盈而福謙人道惡盈而好謙蓋滿則招損謙則受益此一定不易之道古聖人所以惓惓垂訓也人之所以能謙尤在於公而不私和而不同周書之示誠則曰以公滅私虞書之陳謨則曰同寅協恭和衷哉公私和同之間實君子小人之所由分凡人立身行已待人接物未有不嚴辨於此而可以無失者也朕日以公和訓誨諸臣而能遵奉者少爾等同為國

家大臣彼此實屬一體若見彼有錯誤之處即當密告之令其悛改而聽受之人默感其意即改其愆方為正理今則見人有錯誤於背後譏誚之而當面且作褒揚之詞間有箴規過失者聽者不但不感且從而怨恨之身為國家大臣豈可蹈此等陋習子路人告之以有過則喜其樂於聞過者正其勇於改過也今人能自知其過者甚少如朕降旨詰責處分之人伊等心中尚懷怨望不能省愆何況朋友箴規之言安能欣然聽受乎易

曰君子以虛受人周子通書曰無欲則靜虛動直蓋凡
人之心虛則明有所蔽錮則昏人有欲求好之心尚流
於偏而不得其正況心意之間全是一團私欲蒙蔽其
顛倒錯亂可勝言乎諸臣能公則可以祛意念之私能
和則可以去阿比之習既公且和則自然能謙能虛於
已則樂受規勸之言於人則能盡直諒之道人已之間
兩得之矣

十一月己巳廣東將軍蔡良叅奏左營中軍副將

金國泰右營遊擊吳廷元酗酒不職

上諭兵部廣東文武官員每以飲酒宴會為事相習成風
今將軍標下將弁羣聚酣飲致相爭毆此風不改官箴
安在書經以三風十愆儆於有位曰敢有恒舞於宮酣
歌於室時謂巫風又曰卿士有一於身家必喪古訓所
垂豈非官方之炯戒嗣後該督撫將軍應將屬員嚴加
申飭其或不悛即行叅處大凡居官者或遇節令之期
或有喜慶之事設酒開筵原所不禁若以酒食遊戲徵

逐應酬不惟玩愒時日廢弛政務并起忿爭結怨之端
有關大體各省文武大臣俱宜約束屬員時加訓誨庶
於風俗官方並有裨益

雍正七年己酉五月丙午

上諭內閣屢年以來朕以天人相感之理諄諄曉諭內外
臣工蓋朕實切敬

天勤民之念於寤寐之中而確見其感應之不與尤願各
省督撫有封疆之重任者體朕此心至誠至敬各盡其

道以為感格

上天之本惠我蒸民共登衽席朕並非以年穀之順成有
意歸美於大吏亦非以雨暘之差忒強欲卸責於臣工
也假使為督撫者因朕有地方豐歉由於吏治得失之
諭旨而欲自彰其善自護其短於奏報秋成有溢美之
詞於奏報歉收或有諱災之意則事

天為不誠事君為不忠臨民待下為不仁不信有此數端
而欲荷

上天嘉祐錫福凝禧有是理乎况粉飾一己之聲名而不顧生民之休戚其何以對所屬之官民而無愧怍乎朕留心體察覺近來督撫等之奏報年穀間有此弊不得不通行曉諭以防其漸在爾督撫等返躬自思有則改之無則加勉况朕之見聞甚廣訪察維勤倘掩飾於此而敗露於彼豈不自取朕之輕視乎人臣事君之道惟以誠實無欺為本爾督撫等其共勗之

七月辛未

上諭都察院凡人臣辦事務須秉公持正不可存一恐懼
好樂之心若先有恐懼好樂之心則心既不得其正事
必不能合中或太過或不及皆非中庸之道所謂中庸
者本日用常行之事即至當不易之理而人每多習而
不察也且人臣事君尤當至誠不欺若稍存欺心便是
獲罪於天試觀大姦大惡之人天不遽加之顯報必俟
其罪惡貫盈全體敗露然後降之災殃以昭著於天下
後世爾等必先問心若果能不愧幽獨方可質諸大廷

廣衆遇事又必須審定是非不可偏執已見自以為是如辦一事初信為是者寧可再加詳審將他事比較並將他人議論詳酌或有未協之處必求至是而後行蓋天下自有公是公非必心無私曲方能辨別是非凡被他人所惑溺愛不明其為害尚小蓋以人為憑可冀有時覺悟倘自身溺愛不明其為害也更甚而覺悟體察也尤難夫心懷偏私則一己之是非已不能定又何能定他人之是非乎大凡立心行事必從根本上用力方

能有濟若專務枝葉雖費盡心思於事無裨朕辦理天下事務廓然大公因事制宜實不預立成見爾等凡有條奏如果有益於國計民生朕自採納若預揣朕意曲為迎合或袒庇瞻徇畏首畏尾不惟於國家政事無補實難逃朕之洞察在國法何得寬貸也總之人情任勞易任怨難任怨之事不獨在臣工即為君者亦然但存心合乎天理雖有一二無知之輩肆為怨謗久之天下後世自有公論爾等果能公忠為國目下即被小人怨

尤日久自然消釋

上天必加垂佑人主必能體察爾等敬聆諭旨各思奮勉
勿負朕教誨之至意

雍正八年庚戌九月戊辰

上諭內閣自古為治之道在於和衷孟子曰天時不如地利
地利不如人和蓋天下之事未有不和而能有成者
果能和矣則天地神明尚覺呼吸可通而況於人乎然
能和之道惟在於公公則必不至於不和不公則斷不

能和此又一定不易之理朕所日日訓誨天下臣民而望其洗心滌慮信受奉行以共享昇平之福也文武雖屬兩途然同在一省一方之中同辦國家之事則不但有同舟之誼實如手足臂指之同在一身也人身一體不適則百骸皆為之不寧此亦顯而易見者奈何為私欲蔽錮而任肢體之互相戕賊以貽腹心之患乎數年以來朕留心體察內外同事臣工頗能遵朕諭旨勉矢和衷之義即文武各官同在一方而各殫其職無爭競

嫉忌之念者亦多有之此皆人心風俗之善亦該省文武大臣實心表率化導之功也惟有廣東一省惡習相沿頽風難挽文與武既分為兩黨而文與文武與武又各分為一黨如楊文乾石禮哈常賚阿克敦官達之互相排陷仇怨相尋則皆方願瑛一人從中播弄之所致至於文武彼此告訐之言不可殫述文官則言武職諸貲或向知府包攬漏稅或向州縣囑託人情稍不如意即出謗言以勤謹辦事者為過於躁急以不徇私情者

為擅作威福又如兵米一項地方有司給與本色而營
弁以不能折價為憾往往蓄怨於心此文員陳訴之大
概也武官則言文職諸員貪鄙居心黨援不解恃有承
審之柄藐視武途大小有司夤緣交結武弁若拂其意
即起釁端以為報復之計常有武職查拏違禁之事如
賭博私宰等類而文員則置若罔聞或徇情釋放又如
礦山聚衆至數千人係府縣官員之家人勾引奸徒開
採希圖重利武弁遣兵驅逐以致結怨益深此武弁陳

訴之大概也年來似此等語達於朕聽者不止數處亦不止數人雖出於怨懟之口不足盡信然以未必皆全無影響之談爾文武各員自思之膺國家簡命之榮受管轄兵民之寄乃以營私網利之故相傾相軋效市井無賴小人之所為而置人心風俗官方戎政於不問爾等不自知愧朕實為爾等愧之也况督撫藩臬而有袒護文官之心則武弁必有被其屈者矣提督總兵而有袒袒護武弁之心則文員必有受其枉者矣文員而有袒

護百姓之心則必有無辜受累之兵丁矣武弁而有袒
護兵丁之心則必有無辜受累之百姓矣不和之故由
於不公不公之害至使官弁兵民並受其困為臣工者
尚可徂於故習而不猛省速改乎巡撫統率全省文員
提督統率通省武弁至於總督則兼文武而統轄之者
果能秉公持正無黨無偏以已身為庶官之坊表而又
時時宣揚朕諭俾其儆戒提撕若遇屬員有爭競告訐
之事則以理判其曲直不存文武偏向之見過小者切

加戒飭過大者即入彈章俾強弱不得相陵是非無或
倒置如此而屬員有不革面革心嚮風率教者無是理
也朕今再頒諭旨通行曉諭著該督撫等遵照刊刻通
省文武大小官弁各給一道俾令朝夕觀覽改前愆而
敦善行倘再有蹈襲故轍罔知悛悔者則是冥頑不靈
自違越於德教之外美國法具在本人自無所逃而文
武大臣表率無方訓導不力有忝封疆之任負朕倚任
之恩亦定行嚴加處分不稍寬貸觀風整俗使亦當留

心稽察可也

雍正十年壬子閏五月甲午

上諭八旗官員人等昔人云和氣致祥乖氣致異此天人相感之至理古今不爽朕以此訓導天下臣民至詳且悉矣去夏今春京師亢旱地猶微動未息朕戒慎恐懼思過省愆幸邀

上天慈恩錫以霖雨不致大為災患然所以垂象示儆必有由來朕留心體察於旗人得一二事似有抑鬱不舒

之氣以致上千

天怒朕不得自寬衆亦各應自省也如用兵準噶爾一節
八旗將士遠役於外父母妻子愁望於家或者以為朝
廷不惜士卒有此可已而不已之舉不知準噶爾賊夷
狡獪兇頑世濟其惡擾害我臣服之蒙古窺伺我西北
之邊疆若不加創懲則蒙古不獲安居邊塞不能寧謐
我八旗之人尚得優游燕處度外置之乎是知

皇考經理於前朕紹述於後皆出於萬不得已並非窮兵

黷武欲拓地開疆而疲勞將士於沙漠窮荒之地也觀
近日賊夷跳梁之狀以我朝大兵駐劄邊境而猶心懷
覬覦敢肆狂逞則從前雖欲棄置不問以圖息事寧人
其可得乎我滿洲八旗人等素有忠義之心勇敢之氣
爾等祖父自從龍入關以及各處征討削平寇亂皆以
捐軀致命為榮以老死牖下為恥今乃承平日久習於
宴安因數年之征戍即生愁怨之心而忘乃祖乃父之
勞績何志氣墮惰自暴自棄一至於此乎從來急公殉

難者享千古不朽之榮名而奏凱獻功者膺國家寵褒之爵賞豈但出征弁兵當勇往爭先即其父母妻子亦當深知大義遏抑私情務其遠大則忠君報國之悃誠必蒙

上天垂鑒默加福祐大功可以立成凡列在戎行者均受國家逾格之恩澤矣又如催追虧空一節聞八旗人等亦以為苦累獨不思居官之人侵盜國帑剝蝕民膏律以國法皆在不赦之列朕以習染既久人數衆多不忍

加戮特從寬典勒追還項以儆將來使知侵盜橫取之物不足以長子孫庶可以止姦貪而厲廉恥此朕之苦心實欲為人心風俗計也若云朕為財物計而為此綜核之事獨不思十年以來朕之減除正賦蠲免積逋與夫興修工程賑濟賞賚加惠於官弁兵民者所費不下數千萬曾無吝惜豈有惟與旗人較量錙銖之理哉且雍正三年以前之舊欠朕已令該旗大臣等查奏酌免矣朕之意旨旗人既未能悉知該管官員又不能宣布

開示每於催迫之時過於嚴刻甚且牽累無辜此庸劣不忠之大臣奉行不善而更隱示以奉朕意旨致令若輩心懷怨懟朕旨果如是乎夫獲罪而不知悔沐恩而不知感此皆乖戾之氣均足上千

天和用是再頒諭旨通行曉諭儻八旗人等果能遵朕訓誨洗滌肺腸共矢愛君親上之懷永絕昧理欺公之習不但朕之沛澤施恩必先自旗人始而

上天福祐善良諸事吉慶亦可預信其必然矣

雍正十二年甲寅正月己卯

上諭諸王大臣等爾諸王大臣以元旦立春恰遇甲寅年
丙寅月戊寅日甲寅時瑞雪繽紛竟日盈尺考之占書
最為嘉祥豐年可慶為朕稱賀朕素不言祥瑞降諭至
再至三爾諸王大臣聞之熟矣凡祥瑞者特其兆耳兆
為吉之先見全在人事贊成凡靈芝御雲麟鳳嘉禾之
屬皆

天心所以示喜豈得不以為慶但須君臣益加修省以祇

承休命果能事事上合

天心則祥乃成其為祥否則其事尚在未成何得遽為稱
慶洪範恭之對待曰狂如或因有嘉兆而不加修省遂
侈然自肆則咎徵特在轉移之間耳祥其可恃乎譬如
爾諸王大臣朕以其人可用許以加恩其人一聞朕旨
便自放縱頓改前操朕亦惟有收回成命加之以罪豈
得更不轉移而仍以恩待乎朕於天人感應之際信之
甚篤知之甚明信之篤是以一刻不敢自懈自逸知之

明是以不憚反覆申明誥誡詩云天維顯思無曰高高
在上蓋面前虛空即是昊天足履撮土即是大地如人
有七尺之軀拔一毫毛則通體皆知痛癢豈人於天地
之中舉一念行一事而天地有不呼吸相通者乎作善
降之百祥作不善降之百殃如影隨形如響應谷形谷
既存而以影響為不可必之數豈不愚昧之甚夫善者
公而已矣心乎天下國家之謂公心乎一身一家之謂
私為大臣者誠心乎天下國家之公而不計及一身一

家之私天有不降之百祥者朕信其必無是理然則其
一身一家之計正復得則兩得也苟心乎一身一家之
私而不計及天下國家之公天有不降之百殃者朕亦
信其必無是理然則其一身一家之計亦復失則兩失
也朕雖深信此理朝乾夕惕不敢刺忘然天下國家之
事非朕一身所能獨理書曰天工人其代之朕不能不
賴爾諸王大臣之克代天工則朕固不能已於諄諄訓
誡爾諸王大臣也人惟無志則不能自立而推諉他人

如為大臣者以天下國家之事為已事身任之而不辭
一人如是人人如是則內外大小諸務有不事事合宜
者乎如使內而八旗部院每事諉之叅佐司屬叅佐司
屬又諉之大臣外而督撫藩臬每事諉之府廳州縣府
廳州縣又諉之督撫藩臬又或內則諉之於外外則諉
之於內皆謂主上自有乾斷如此則朕雖朝乾夕惕亦
何由使事事合宜以仰邀

上天之嘉祥福應乎今歲元旦時雪既有其兆當益加奮

勵朝夕脩省以成此瑞慶我君臣其共勉之

雍正十三年乙卯正月壬辰

上諭內閣朕每見天下督撫有司等於人命盜案查審定擬時曲為開脫以行其婦寺之仁意謂寬宥一人可以種陰德於冥冥之中不知君與臣皆任教養斯民之責平時不能殫教養之道使之不陷於重辟在吾君臣已有所不得辭之過然尚屬伊等干犯法紀自取其罪國家設立科條原以禁暴除姦使人共守非可枉法市恩是

故刑罰之設乃不得已而然至於水旱災荒天時有不齊之數鰥寡孤獨人生有所遇之窮彼寧填溝壑而不肯為匪者率皆良民似此無辜之赤子不幸而遭值困阨朕以牧養斯民之任寄之天下督撫有司而不能保護撫綏登之衽席乃視同秦越聽其饑餓流離此孟子所謂受牧牛羊立而視其死者

天高聽卑必加重譴而顧欲於命盜案中曲活一二有罪之人以冀倖邀福報何識見顛倒一至此乎朕望天下


督撫董率有司屏棄虛文敦尚實政平時則勸農教稼
闢地墾荒崇儉黜奢儲糧積粟以立其根本偶遇旱潦
即據實奏聞殫心區畫俾澤中鴻雁共慶樂郊有此濟
人利物之功方不負父母斯民之職較之曲活一二罪
人者相去奚啻霄壤耶至於樂善好施史稱義舉扶危
濟困人有同心周禮以六行教萬民孝友睦婣而繼以
任恤可見任恤之道與孝友並重也鄰里鄉黨之間原
有休戚相關之誼以已之有餘濟人之不足在我本為

不多之費而在人已為當厄之施況民有秉彜自然觀
感興起衆擎易舉利益孔多從來積善之家必有餘慶
一人行善則慶在一家衆人行善則慶在萬姓果然風
俗淳良號稱仁里則和氣致祥天道之感應捷於影響
凡水旱災侵之戾氣悉變為五風十雨之休徵矣然興
仁樂善者乃鄉鄰長厚之風而鼓舞旌揚者則大更有
司之責如所屬內有紳衿士庶惠愛鄉閭力行善事該
督撫等當優禮褒嘉加意培植以表揚之應題請者即

行題請將朕此旨刊刻頒布務使遠鄉僻壤人人知悉



大清世宗敬天昌運建中表正文武英明寬仁信毅大孝
至誠憲皇帝聖訓卷二十



總校官庶吉士 臣張能照

校對官編修 臣周厚輅

謄錄監生 臣陳廷瑜

謄錄監生 臣毛敬事

欽定四庫全書叢要

史部

世宗憲皇帝聖訓卷二十一

詳校官編修臣繆晉

欽定四庫全書舊要卷七千八百五十三

史部

大清世宗敬天昌運建中表正文武英明寬仁信毅大孝
至誠憲皇帝聖訓卷二十一



勵將士

雍正元年癸卯正月辛巳

上諭提督國家武功赫濯綏靖區夏用資專閫統率全省
將士俾黎庶誠和疆圉寧謐提督之任綦重矣當茲海
宇承平士卒徂於宴安不以兵革為事相沿日久營伍

漸弛非所以肅軍政飭戎行也爾等皆係

皇考簡用節鉞之大臣尤宜恪遵令典倡率所屬將弁簡閱卒伍整理器械操演技勇平時討論軍實訓練精勤乃稱節制之師折衝禦侮庶幾有備無患矣夫儲糧裕餉所以足兵食壯干城非為飽一人之私橐也乃虛名冒餉侵漁扣剋視為故常以致朝廷恤兵養士之典止供將吏肥家之計居心多慾自難彈壓下僚馭衆寡恩何以振興士氣提臣職任拊循果能廉正自持無虛給

餉俾士飽馬騰有不感激思奮者乎至山海要區得人最重爾身為大帥凡將佐偏裨果其智勇素著才技優長肅紀律而輯兵民歷有成績之貞或軍政薦舉或破格題請皆當予以優擢如本係庸劣之弁徇情面受賄賂始則權宜委任旋復列名保奏不特冒干名器必致貽誤地方濫用匪人之咎其能逃於功令乎且設兵所以衛民文武官屬殊途而轄兵愛民均有責焉如各執已見不相和協勢必有縱兵虐民挾制長吏以逞威作

姦者在文臣豈容辭咎而提臣統領水陸重師管轄不嚴調劑不力致文武抗衡兵民異視責更難追書曰同寅協恭和衷哉爾當一秉虛公和衷辦事嚴飭將弁於所屬汎地實心捍衛勤緝姦宄俾民居安堵無虞地方咸受其利益爾等皆勤勞素著効力年久之人

皇考屢加拔擢洊膺斯任朕祇遵成憲優遇大臣保全終始爾等其各抒忠悃以無負朕愛養兵民之至意其總兵副將叅遊等官各有諭旨爾亦應詳細體察同心協

力共相策勵靖共爾位永奠封疆

是日

上諭總兵官國家幅隕廣大凡巖疆重鎮關塞要害之地
設立總兵俾之鎮守上承督臣之節制下樹將弁之表
率輯兵安民厥任綦重居是官者當以寧謐地方為念
嚴飭官兵巡緝姦宄儻有匪類務必窮盡根株使宵小
無從潛匿良民得以寧居若平時漫無覺察日久必致
蔓延綢繆未雨之謂何武臣雖不干民事然保障捍衛

責有攸歸守此方即當軫念此方之民毋得視之膜外
縱兵肆擾至文武職任雖分盡心王事則一彼此和衷
同心共濟自不致貽誤公事況揆文振武經術同源善
於恤兵必善於愛民尚何至縱兵虐民失國家設兵衛
民之意乎總兵統轄營汛甚多當以訓練為先嫻騎射
整隊伍備器械限期校閱勤惰嚴分賞罰明而軍政肅
隱然一長城矣所屬將弁兵丁智勇超羣則立登薦剡
武藝精熟則特拔戎行以之鼓勵軍士猶有古良將風

馬兵之所需糧餉最重給糧而扣剋則師旅有枵腹之憂缺兵而不補則營伍有空虛之患總兵率先潔已嚴飭偏裨毋得久懸兵缺以恣侵漁毋得剋減額糧以肥囊橐則兵籍無虛士氣益奮有不收臂指之效者乎至於馭兵之道務在寬嚴得中過寬則兵以怠玩而生驕過嚴則兵以拘迫而滋怨能於嚴明之中隱寓愛恤之意庶幾上下一心忠義自奮此又在爾鎮臣之善為運用者也仰惟

皇考垂誠提鎮諸臣有曰韜鈴宜裕紀律宜明拊循宜至
訓練宜精又曰文武輯睦毋相抗衡軍民調劑各得其
平煌煌

天語勒於箴規久矣爾等皆係

皇考簡畀之人果能實心力行不致始勤終怠上負

聖訓朕心嘉乃成績必懋錫殊典如其徒擁厚祿虛糜爾
位既無益於兵民致有乖於令典國法森嚴朕不爾貸
也

是日

上諭副將叅將遊擊等官朕惟國家兵制凡疆宇要地既設提督總兵統率鎮守又設副將叅遊分列營伍遞相鈐轄蓋從古治兵有大帥必有偏裨所以宣揚威武協贊軍機收指臂之效奠磐石之安也爾等所屬地形有險易兵數有多寡各宜預定練兵之法親校騎射嚴試技勇簡拔驍銳更換老羸務令一營士卒人材雄健武藝精嫻又時教以行陣使之步伐進退井然有法日演

月習氣壯心齊自成有制之師而無難折衝禦侮矣乃有不肖將弁不勤訓練按籍徒有虛名責效毫無實濟營伍廢弛為害最大究其弊由於將弁之貪利而廢法一在冒虛糧而兵無實數一在剋月糧而兵有怨心上虧天家之糧餉下朘窮卒之脂膏身司戎務而不能廉正以服衆雖日示訓練之法誰為之踴躍用命乎爾等遇有兵丁空缺即選力勇技精者補足隊伍至於馬步各糧按期領給不得剋減分毫古之良將多以愛恤士

卒克建膚功投醪挾纊之風爾等宜知嚮慕焉官軍之
協守一方所以捍衛一方之百姓故曰設兵以衛民也
防亂於未萌緝姦於已發俾居民安家樂業共享昇平
自然受兵之利而不受兵之害儻或約束不嚴縱兵肆
虐誘賭放債恃強奪利甚至地方小警漫不防禦緝捕
以致姦宄滋蔓徒卸責於有司文武失和秦越相視殊
背國家設兵鎮守之意律法具在罪有攸歸至於爾等
簡用督撫中軍責任匪輕尤宜潔已奉公恪遵法紀至

都司守備千總把總等員各有城守汛防之責亦宜努力稱職自奮功名朕念爾等曾受

皇考選擢之恩自應保守前勞力圖後效果能整飭戎伍允著千城之望朕自不惜寵以崇堦儻若廢弛武備侵漁輿芻甚且妄執武官不惜死之言恣意逞威虐民生事為害於地方王法森嚴決難輕貸

四月丁卯

上諭領侍衛內大臣八旗大臣等國家武備關係重大爾

等皆有訓兵責任昔

皇考常躬率士卒寓訓練於較獵之中

皇考騎射超倫士卒無不欽服各相鼓勵並非爾等訓練所致朕不能企及

皇考則訓練之事惟爾等是賴但訓練士卒有實心操習者亦有虛應故事者若爾等按期較射以圖塞責不過閒談飲茶而散則不但徒勞軍士爾等亦徒多往返何益之有此皆朕居藩邸時素所深知者爾等能盡職朕

必全爾等顏面爾等亦宜全朕繼述之孝思嗣後爾等務宜實心訓練比來軍士生計稍艱

皇考教養六十餘年

恩賚頻施無不周備以天下之正供贍養兵丁如此外再欲加增錢糧亦恐難給兵丁生計之艱其故雖多大抵因奢侈所致爾等皆管轄兵丁之人應將平素守分者加以優獎奢侈者加以訓飭則自知懲勸矣此事一時亦難移易朕與爾等約以三年為期如三年後仍不能

改爾等之罪不止罷黜且一經罷黜勿希復用彼時勿更怨望

六月乙亥

上諭領侍衛內大臣八旗都統等附近京畿等處駐防八旗官負兵丁內儘有曾經出征効力者伊等並無陞轉之處應選其漢仗好人去得勞績宣著者給與陞階著公同會議具奏

九月辛卯

上諭湖廣總督楊宗仁天下綠旗兵丁大率十分中有二

三分空糧為專閫大臣及將弁等所侵冒而老弱殘疾不能騎射者復充當兵數徒令國家錢糧費於無用之地夫武備關係重大額設兵數不特緩急恃以為用並藉以防緝盜賊守護城汛豈可任聽將弁挑選隨丁一無拘限今奉天等處將軍副都統官負俱令酌選數名著為定額其提督總兵以下等官亦宜照例酌定各於該管兵內查有不堪者亟應沙汰選擇年力精壯漢仗

雄偉者頂補嗣後營伍騎射須時加操演火器營兵在
春秋二季操演水師營兵在戰船操演其安營布陣進
退作止之法務令精熟盔甲器械船隻等項務令堅固
沿途守望煙墩之兵量增數名酌計幾墩令千把等員
輪流分轄不時稽察至山谷林麓近江濱海險僻處所
或有匪類潛藏亦未可定應派委叅遊以下二員領兵
四十名時往巡哨更須嚴飭所領兵丁經過地方毋許
騷擾兵丁內有實能效力弓馬嫻熟者遇有把總缺出

即行錄用以示鼓勵其懶惰刁悍者嚴行責革以彰法紀從前把總一缺提鎮將弁每將家丁及同鄉戚屬虛冒錢糧毫無勞績者朦混佔補似此何以服士卒之心今限一年內徹底肅清儻不遵諭旨仍蹈前轍定將該管大臣及將弁等從重治罪爾封疆大吏各宜敬凜毋忽

雍正三年乙巳五月壬寅

上諭直省提鎮等我

皇考聖祖仁皇帝優待武臣恩眷之隆自昔希比諸武臣

感激恩寵遇事奮力効命但平日居官砥礪操守撫恤
兵民之道尚多不及夫為將弁者雖貴乎材勇然使有
衝鋒破陣之才而不能潔已愛人撫綏士衆或至扣剋
貪婪人罹其害則與盜賊何異彼盜賊之肆行劫掠不
恤身命何嘗不勇惟因利人財物遂謂之為盜賊而法
在必誅勇不足稱即為可恥凡爾武臣務須廉潔持躬
奉法循令恤兵愛民綏輯地方遵國憲正所以重身家

也設或婪財貪利橫生事端致干法網則地方既滋擾害而法所不容國家又失一勇力有用之材豈不可惜是知心存報國最在平日之愛恤兵民安靜守分耳若至生事擾害之後雖或捐軀亦何所補從前縱有微勞亦不足以贖此日之罪愆矣爾將弁當各輕目前小利勉為國家梁棟垂名竹帛以圖光前裕後之功業可也勉之戒之勿負朕諄諄告誡之意

十二月乙酉

上諭兵部朕君臨萬方中外一體有功必賞有罪必懲初

無偏黨之心亦並不存依違之見前以羅卜藏丹津潛
行悖逆謀擾邊陲朕命將出師用彰天討滿洲綠旗漢
土官兵皆能奮勇爭先克成懋績論功行賞恩所宜施
乃年羹堯以私昵人員冒濫入冊以致綠旗官兵議叙
至今駁查未定而土司功冊亦因之暫停朕心深為憫
念夫土司非比內地凡所遣調目兵皆預定名數按名
隨師無從虛冒其功績等第必當詳確稽查如四川屬

之瓦斯雜谷二土司部下目兵與三寨色坐之頭目所部番兵皆屢年効力戰功尤多小金川土司湯鵬陝西土司魯華齡於攻取桌子山時其目兵亦能効力用命似此邊遠番衆知効忠誠則其寸功必宜盡錄爾部查照領兵官所報各土司功冊除各土兵已給賞賜外其官目應各加以職銜仍予恩賞陣亡帶傷者照依綠旗兵丁一體優恤務期均沾實惠仍將此旨下與該管督撫提鎮轉飭各土司自茲以往尤宜益矢忠勤各安駐

牧嚴束部落不得滋事生非和睦族鄰不可恣行仇殺
尺地莫非王土率土莫非王臣番苗種類固多皆係朕
之赤子或有強悍不平各土司祇宜赴該管上司陳告
豈得任意戕殺以背朕好生保赤之念各該土官果能
凜遵訓誡則世守職土朕自加恩若敢恃功驕肆陽奉
陰違則國法具在亦斷不因今日之功賞更從寬貸也

雍正五年丁未二月庚申

上諭直省督撫提鎮等向例千把總俱由督撫提鎮拔補

往往以其家人長隨及私自効力請託夤緣之人補用
徇情面而無公道以致老弱不堪之人得授千把總者
甚多其所管汛地道路之遠近俱茫然不知而兵丁內
年力精壯技勇可觀者轉不能得一官職甚為可憫千
把總職掌關係營伍有稽查汛地管束兵丁之責又為
行伍出身之途若聽其因循冒濫何以整飭戎政鼓舞
兵心今定半年之限令該督撫提鎮將所轄千把總內
除曾經効力久歷行伍尚堪任使之人外凡有老弱不

堪不能稱職者秉公細加看驗考試盡行沙汰不可姑容一人其所出之缺務將兵丁內年力精壯技勇可觀之人從公選擇拔補不得仍蹈故習

十一月丁丑

上諭八旗都統等歷來滿洲人材壯健弓馬技勇罕與比倫前令八旗查得親軍護軍內能開八個力以上硬弓者現有一萬八千餘人昨朕在瀛臺考試天下武舉騎射之後令八旗人等當衆人之前較射伊等所用之弓

自十八個力以至十三個力不等舉重若輕從容合度
衆武舉等咸驚異以為從來罕睹朕心甚為嘉悅著分
別賞給銀兩伊等藝勇超羣是其盡心學習之所致嗣
後務須更加勉勵演習熟練不可以弓力相爭尚將此
通諭八旗知之

雍正六年戊申正月庚辰

上諭值班侍衛及守衛護軍等滿洲舊制最重學習清語
近見挑選之侍衛護軍等棄其應習之清語反以漢語

互相戲謔甚屬不合且滿洲人等俱係

太祖

太宗

世祖

聖祖皇考之所留遺者當日耆舊大臣務以造就後進為
心每將學習滿洲本務努力上進之語時時教導今兵
丁直班之處彼此戲謔殊非善習嗣後各宜勉勵屏除
習氣以清語拉弓及相搏等技專心習學此爾等進身

之階國家亦收得人之效矣

雍正七年己酉正月戊申

上諭兵部各省守備內有操守廉潔漢仗去得諳練營務
熟習水師堪用遊擊之員爾部行文該提督出具考語
分別水師陸路填寫年歲籍貫履歷照保舉副將叅將
分定等第之例開列一等者咨部俟降諭旨再行調來
引見所保人員務期秉公據實毋得瞻顧徇私倘保舉
之後有改易前轍不思奮勵精進者亦照副將叅將更

換等第之例咨部改定以副朕簡選任使之至意

十二月乙巳

上諭內閣國家設兵衛民所以安良除暴雖尚武勇之力
然必謹守法度顧惜廉恥不為犯法干紀之行始不負
朝廷養之恩可以有上進之望八旗兵丁國家所以
養之者甚厚偶有差遣征勦之事復加意體恤賞給各
項銀兩行糧之外復給坐糧所以籌畫其用度養贍其
身家者至周至渥矣為兵丁者自宜感戴國恩兢兢奉

法共知自愛以邀爵賞而沐寵榮况朕之訓飭教導者
至再至三豈伊等尚不知猛醒痛改惡習乎乃自藏回
陝之八旗兵丁四百名仍有沿途騷擾居民之事經撫
臣憲德兩次叅奏共一百三十餘件似此負恩犯法無
知無恥朕實為伊等深愧之且其所得有限乃一時率
其獷悍之性不知檢束以至身投法網罪無可逃能不
愧悔况損人利己者天理之所不容強奪橫取者國法
之所不宥爾兵丁等奈何惟利是貪而不顧天理不畏

國法為此可羞可愧之行乎今將該撫所叅各款一一開出並降此旨著交與八旗及各省駐防管兵官員等各抄錄一道每月傳集兵丁敬謹宣讀令其觸目警心時時檢束恪謹遵奉

雍正八年庚戌四月丙午給事中王瓚疏言設兵所以衛民每見督撫提標之兵駐劄省會地方自謂大標平素欺壓良民挾制上官又或因公調遣先有許多借貸求懇以致鎮協標兵聞風借口此

實臣見聞所及特行奏聞

上諭兵部從來教練兵丁之道固在乎技勇優長尤在明曉禮義謹守法度聖賢所以著有勇知方之訓數年以來朕軫念兵丁屢加恩恤其該管官弁若有扣剋糧餉者必嚴加懲治又為督撫提標兵丁等籌畫生息之策濟其吉凶之用無非望其循理奉公以受國家之恩養也但聞有數省兵丁驕縱之習難除傲慢之風未改而湖廣為尤甚今見給事中王瓚所奏甚為詳悉切中兵

丁之弊此實該管官員之責著直省督撫提臣切加訓誨嚴行約束儻有生事不法者即重治其罪毋得姑容以長惡習如徇隱寬縱經朕訪聞必將該管官從重議處該給事中雖稱鎮協之兵不若督撫提標之甚然兵志易驕難分優劣該管官亦應時加訓飭儻蹈故轍咎有攸歸著通行曉諭督撫提鎮等標共知之

七月壬申

上諭八旗武職大臣等武藝者乃滿洲之本務八旗大臣

有管轄兵丁之責理宜操練武藝習勞苦耐寒暑以及疾趨超距撲跌等技留心諳習近觀大臣官員侍衛等值班俱不親佩腰刀一味偷安又不操練服習勞苦倘遇緊要處不能爭先獨使兵丁前進乎抑停留等待乎且至彼時力不能支即懷奮勇之心亦屬無用安能使兵丁克稱精銳乎從前

皇考每歲行圍令衆人學習技勇服習勞苦及朕即位仰思

皇考付託之重八年以來勵精圖治未及巡幸郊外而武職大臣侍衛官員兵丁技力亦漸不如前不可不急為整飭嗣後八旗武職人員及各省駐防之武職人員年未至五十五歲者勒限半年令各奮力學習一切技勇若仍有自圖安逸不肯學習者或經朕調來引見或經朕行幸時查出必重加懲治責草照違旨例治罪如有學而不能者准其告退

雍正九年辛亥二月乙卯

上諭管理旗務大臣等朕因八旗兵丁不甚整齊曾屢降諭旨命都統等善為訓練俾各兵丁俱成精銳乃至今尚未整齊此皆都統等未嘗悉心訓練之所致也著傳旨與八旗都統等於驍騎營兵內擇其年少無疾騎射不堪不能滿洲蒙古言語之人滿洲蒙古每旗合派一百名共八百名八旗漢軍合派二百名共一千名在西廠子聖化寺等處設立一營令其學習一切技藝更於驍騎營官內擇其年少而行走急惰者滿洲旗分各

派二員蒙古漢軍旗分各派一員令與兵丁一同學習
使人人皆成精銳至於八旗前鋒護軍內騎射稍優年
力精壯人材可觀而未經服習勤苦之人有願入其中
學習者亦著挑選一千名另立一營令其學習其前鋒
叅領護軍叅領副護軍叅領護軍校之內有願與兵丁
等一同在彼學習者每旗各派二員此項兵丁諸處俱
不得差遣每日學習騎射所用之馬令伊等親身飼養
以習勤苦營內一概不許漢語惟習清語或蒙古語其

教習趨走超距及清語等事於索倫新滿洲烏拉齊內
挑選好者分為三四班令其教習至於總管二營不必
派委都統等著將領侍衛內大臣散秩大臣職名開列
朕酌量派委令其管理

雍正十年壬子正月丁卯

上諭八旗兵丁等兵可百年不用不可一日不備帝王之
治天下未有不以明武備為先務而兵丁之武藝亦未
有不勤加訓練而能有成者從來士農工商各治一業

苟不專心竭力則其業必不精况兵丁所司者皆戰鬪之事彎弓挾矢冒鎬衝鋒非膂力剛強不能披堅執銳非技藝嫺熟不能克敵宣威奈何怠惰苟安虛度歲月不思國家設兵之本意不念自己專司之職業乎爾兵丁等世受國恩朝廷愛養猶如赤子凡八旗將軍大臣等多由行伍出身漸登榮顯爾等誠能立志向上奮勉自勵勤加練習技勇可觀將來建立功勲馳名軍伍不但本身有上進之階且光耀宗祖榮及子孫受福曷可

限量哉國家承平日久人人耽於安逸武備漸弛今當
邊陲用兵是以降旨令勤加操演又念操演之兵若仍
輪流值班則其力難以兼顧而工夫未免間斷是以不
令該班俾得專心訓練又復給以飯錢資其食用無非
體恤爾等之勤勞也爾等各宜勉力學習如騎射長槍
之類必令純熟精強用成國家之勁旅以柔弱怯懦為
恥以安逸華麗為戒人之力量用之則日增不用則日
減如出城操練之際正可演習步行又何必騎馬乘車

徒多糜費嗣後果能仰遵朕訓努力向前且互相勸勉
鼓勵銳氣朕必聞知加以格外之恩賞如有不肖之徒
苟且怠玩甚至妄生怨言搖惑衆聽此不但藐視公事
自誤功名實為人心風俗之害經朕察出必以軍法從
事勉之勉之

是日

上諭八旗該班兵丁等目今軍興之際兵丁等訓練操演
甚為緊要若以操演之兵仍今照舊該班則訓練未有

專功技藝難以純熟是以特加挑選令其每日操演將
爾等分作兩班輪流當差所以使操演之兵得專心學
習也然人果有上進之志何時不可黽勉何地不可學
習即如爾等換班之時原可練習技藝雖該班之地不
便演放槍礮而拉弓相撲舞棍趨走等技藝在領班之
大臣官員未嘗不可訓練爾等慎勿以未經入選不在
操演之列自甘懦弱而不勤加訓練也夫該班與操演
俱係一體出力且操演兵丁如有缺少自必於該班兵

丁內挑補則爾等不更當奮勉乎現今雖將爾等分為兩班較前稍為勞苦然較之軍前之人則勞苦又相懸絕矣數年後仰邀

天眷大兵凱旋之時爾等差使仍得暇豫從容倘目今不思黽勉但偷一時之安以致技藝生疎則日後必為無用之廢人國家經制錢糧豈有養贍廢人之理如有此等無知不肖之徒一經查出除革退錢糧外仍從重治罪

三月戊寅

上諭兵部向因武員養廉不敷以致扣剋兵餉是以酌定親丁名糧以為養贍家口之費又因營伍公用無資定有額兵百名准抽二名之例似此曲加體恤無非施恩於弁員使應有之兵數再無虛冒以收戎行之實用也近聞各省中尚有數處不能全除空糧之弊或於親丁名糧之外仍有家入長隨頂名支領者又有字識匠作之類亦得濫充額數暗佔兵糧者且或游手之輩賄求

濫充而勇力之人轉不得入選每遇調撥差用則委靡
退縮不耐勞苦前歲湖廣提標曾以兵丁二百名調補
鎮筵四營其中逃避者即已過半又如援勦黔苗時提
標兵丁往來鎮筵六里等處跋前疐後行役惟艱國家
歲費帑金養一兵期獲一兵之用若實存之名數既有
空虛而在伍之兵丁又復怯懦不振則所謂武備修明
者安在乎著該管大臣用心稽查勤加訓練務將陋規
永革諸弊悉除毋得溺於積習苟且因循負朕委用倘

屢經訓飭之後仍有不知悛改者定當加以嚴譴

雍正十一年癸丑正月丁亥辦理軍機大臣等議
准署陝西總督劉於義奏駐劄陝西省勇健營兵
丁其中多驕悍不可用之人請令總兵周一德等
甄別挑汰遞回原籍

上諭曰朕前以各省民人內必有人材壯健技勇可觀願
為國家効力以圖上進者是以特降諭旨令各省督撫
召募揀選送京訓練以備軍旅之用伊等如果能奮勇

出力建績立功將來俱可為干城之寄故疊加恩賚於
應募後即各給守糧一分贍養家口到京後撥給房屋
居住月餉銀米從優給發起程赴陝又各賞衣裝路費
銀兩暫令駐劄近邊地方以候差用俾伊等各展効力
之心並圖進身之路是朕加恩於勇健兵者至為優渥
伊等各自揣量實為過分乃其中多有放縱驕悍生事
不法者上年到京即不安本分肆行爭鬪及令赴陝沿
途又復生事騷擾該督撫曾具摺叅奏而駐劄甘州之

後竟有私自脫逃之人陳天培又經具奏此等無賴之徒固由各省督撫不慎重揀選濫募充數總統大負不能嚴行約束整飭教導而在伊等受恩而不知感自甘廢棄冥頑惡劣即令調赴大營亦不可用著總兵周一德即行甄別挑汰遞回本籍交該地方官嚴加收管不令出境生事若有心懷怨望捏造浮言并恃強肆橫關毆不法等事該地方官立即拘拏稟知督撫提鎮一面奏聞一面按法究治至於挑存可用之人俱應感激朕

恩遵循法紀嗣後益加黽勉努力戎行以圖上進朕必加以恩澤著將此旨曉諭知悉

六月丁巳

上諭兵部武弁中熟習水師之人甚為難得該管大臣若不於平日留心儲養何以收入地相宜之效每見督撫提臣中有將熟習水師人員題請調用陸路者此皆未曾周詳籌算之故著通行傳諭嗣後細加體察若在水師中平常而長於陸路者准其調補若係長於水師之

員俱留於水師題補不可因陸路需人輕易改調以致用違其長從前有如此誤用者可查明題請改調向後部中推陞之缺亦著該部申明請旨

十一月辛丑

上諭兵部從來將備之選務須精悍之材雖目不識丁而膽畧豈關文采縱貌非出衆而義勇無礙粗疎蓋整肅部伍委寄干城矢奔走於疆場甘勤勞於行列類非薄具聰明小有材幹者之所能為而勁健渾樸氣盛力充

之裨弁所當畧短取長加意造就以儲將材以重武備者也近見各省督提等保題引見之大小弁員除軍功勞績外大率以明白勤敏才堪辦事註考朕親加簡閱並逐一詢問奏對便給者有之才具明晰者有之而人材雄偉技勇超軼者曾不數見豈明白勤敏即可為將材而才堪辦事即所為武備耶嗣後該督提等凡保題將弁務重弓馬兼選漢仗全材難得實效須收如仍有軟弱而謬稱熟練以機巧而謬稱通達濫行保題者

是重違朕訓膜視封疆矣定將督提等嚴加議處

雍正十三年乙卯三月甲午

上諭兵部國家設立兵丁原以充緝盜安民之寄廣東為
濱海巖疆武備尤宜勤練不應少有廢弛查通省兵丁
共計七萬餘名不為不多歲費俸餉將及二百萬兩國
家養之者不為不厚乃近年以來朕留心訪察粵省兵
丁怯懦退縮者多奮往用力者少曾有客船被劫盜止
八人汛弁兵丁一任事主喊救閉門不出又巡哨私鹽

不能擒捕屢被打傷搶去器械此朕訪聞甚確者同一
廣東之人而為盜賊私梟者則強悍無比其食糧入伍
者轉怯弱不堪皆由將備選募時多憑兵家子弟親戚
夤緣充當但取其應對熟嫻趨蹌便捷不但民間強壯
勇敢之人無由入選即餘丁中之勇健而質樸者亦棄
而不錄以致營伍之中習尚虛文全無實濟此乃戎政
之最有關係者著廣東督撫提鎮等嚴飭所屬將弁痛
改從前陋習嗣後募補務取強健勇敢之人時加訓練

申明賞罰如再有遇賊退怯等情必重懲以示儆其現在老弱之輩濫充營伍者作何沙汰募補之法著該督撫提鎮等秉公妥議辦理倘仍蹈前轍者經朕訪聞必將督撫提鎮及大小將弁分別嚴加議處不少寬貸

大清世宗敬天昌運建中表正文武英明寬仁信毅大孝至誠憲皇帝聖訓卷二十一